

Umiarsuarni inuttat pillugit inatsisip Kalaallit Nunaanni atuutilersinneqarnissaannik peqqussutip Namminersorlutik Oqartussat akuersinissaat pillugu Inatsisartut aalajangiiffigisassaattut siunnersuut.

(Ineqarnermut Attaveqaqatigiinnermullu Naalakkersuisoq)

Akissuteqaat

(Ineqarnermut Attaveqaqatigiinnermullu Naalakkersuisoq)

Aappassaanneerpeqarnera

Naalakkersuisut sinnerlugit, Inuussutissarsiornermut Aatsitassanullu Ataatsimiititaliaq umiarsuarni inuttat pillugit inatsisip allanngortinneqarnissaannik kunngip peqqussutaanut isumaliutissiissuteqarnermini sukumiisumik suliaqarsimaneranut, qutsavigaara.

Naalakkersuisut naammagisimaarlugu maluginiarpaat ataatsimiititaliap siunnersuutip akuerineqarnissaa inassutigigaa.

Umiarsuarni inuttat pillugit maannakkut inatsit atuuttoq 1997-imeersoq, kunngip peqqussutaani nr. 608, 25. juni 2001-imeersumi aamma kunngip peqqussutaani nr. 212, 23. marts 2005-imeersumi Kalaallit Nunaannut atuutsinneqalerpoq.

Taamanimiilli umiarsuarni inuttat pillugit inatsimmut arlalinnik allanngortitsisoqarpoq, Kalaallit Nunaannut atuutsinneqalinngitsunik. Taamaattumik kunngip peqqussutaatigut umiarsuarni inuttat pillugit inatsisip ullutsinnut naleqquttunngortissinnaagatsigu, nuannaarutissaavoq.

Tamatuma saniatigut imarsiortut sulinerannut atugassarititaasut pillugit nunani tamalaani isumaqatigiissutinut attuumassuteqartunut Kalaallit Nunaata akuersisarnissaa kissaatigineqartoq, umiarsuarni inuttanut kunngip peqqussutaata matuma suliarineqarnerata ingerlanerani, ilaatigut tusarniaanermut akissuteqaatini, oqaatigineqarmat, Naalakkersuisut neriulluarnartutut oqaatigissavaat. Inatsisinut atuuttunut, Kalaallit Nunaata suli Umiarsuarni Inuttat pillugit suliassaqarfinnut atuuttussatut akuersissutiginnigisaanut takussutissiamik Naalakkersuisut suliaqarniarput. Tassunga ilanngullugu Maritime Labour Convention (MLC) aamma aalisarnermut suliassaqarfimmi sulinermut tunngasut pillugit ILO-mi nunani tamalaani isumaqatigiissutip 188-ip Kalaallit Nunaanni akuerineqarnissaannut periarfissat misissorneqassapput.

Taamatut oqaaseqarlunga kunngip peqqussutaanut siunnersuut Inatsisartuni kajumittumik suliassanngortippara.